

# RETNINGSLINER FOR VERKEMIDDELBRUK - INNOVASJON OG NÆRINGSUTVIKLING

Retningslinene ble vedtatt 12.03.2020 i Hovudutval for næring, naturressursar og innovasjon og gjeld fram til eit evt. nytt vedtak.

## 1. Innleiing

Retningslinene gjeld for næringsretta tilskotsmidlar frå Vestland fylkeskommune med delegert forvaltning til hovudutval for næring, naturressursar og innovasjon.

Retningslinene omfattar både midlar frå statlege ordningar og eigne fylkeskommunale midlar der ikkje anna er vedteke.

Dette dokumentet skal bidra til målretta bruk av midlane og mest mogleg sams sakshandsaming. Saman med utlysingstekst vil retningslinene gjere det tydelegare kva midlane kan nyttast til, og gjere støtteordningane lettare forståeleg for målgruppene.

Regionale utviklingsmidlar forvalta av hovudutval for næring, naturressursar og innovasjon skal nyttast i tråd med regionale føringar vist i fylkeskommunale planar, handlingsprogram, og budsjett.

Desse retningslinene er overordna og generelle. For ulike satsingar og ordningar kan det vere særlege som regulerer bruken av midlar.

Klimaomsyn og berekraft er grunnleggjande premissar ved tildeling av midlar. I vurdering av søknader legg vi vekt på effekten prosjektet vil ha på verdiskaping og sysselsetting i regionen eller fylket, og om prosjektet er nyskapande og framtidsretta.

## 2. Kva type prosjekt kan støttast?

Fylkeskommunen støttar tilretteleggande tiltak. Tilretteleggande tiltak adresserer meir generelle utfordringar, og er tiltak på samfunnsnivå. Fylkeskommunen gjev vanlegvis ikkje direkte støtte til enkeltbedrifter. Denne type støtte vert handtert gjennom Innovasjon Norge, regionale etablerarfond eller kommunale næringsfond.

I hovudsak skal midlane gå til mjuk infrastruktur som til dømes klyngesamarbeid, utviklingsarbeid, kompetanseheving og tilrettelegging for næringsutvikling. Unnataket er ordningar der det særskilt vert opna for å støtte fysisk infrastruktur og grunnlagsinvesteringar.

### Viktige prinsipp

- **Klimaomsyn og berekraft:** Søkjar skal synleggjere at prosjektet tydeleg byggjer opp under FN sine berekraftsmål.

- **Utløysande effekt:** Tilskot frå fylkeskommunen skal ha utløysande effekt. Det vil seie at utviklingsprosjektet ikkje vil bli gjennomført utan tilskotet frå fylkeskommunen, eller at det ikkje vert gjennomført i ønska omfang eller til ønska tid.
- **Effekt over eit større geografisk område:** Mindre prosjekt utan regional effekt eller overføringsverdi i form av tema eller metodeutvikling får normalt ikkje støtte.
- **Drift eller investeringar i lovpålagde oppgåver**  
Midlane skal ikkje nyttast til investeringar i statlege, fylkeskommunale eller kommunale lovpålagde oppgåver. Dette gjeld også når private tek over det operative ansvaret for å utføre slike oppgåver på vegne av det offentlege.
- **Driftskostnader og vedlikehald**  
Driftskostnader i næringsverksemd eller organisasjonar kan normalt ikkje støttast om det ikkje er ein del av eit definert utviklingsprosjekt. Vedlikehald av aktivitet vert heller ikkje støtta. Vedlikehald er aktivitetar som er naudsynte for å vidareføre eit produkt eller ei teneste på same nivå som i dag. I nokon høve kan fylkeskommunen løyve midlar til godt grunngjevne tiltak med form av drift.
- **Prosjekt**  
Det kan bli gitt støtte til prosjekt som del av lokalt og regionalt utviklingsarbeid i inntil 5 år.
- **Gjennomføringsevne**  
Det vil bli lagt vekt på at søkjar har gjennomføringsevne. Det vil mellom anna seie at det vert vurdert kva kompetanse søkjar har eller vil knyte til seg, organisering og metodebruk og sårbarheita i prosjektet. Prosjektsøknaden må vere realistisk, og risikofaktorane må vere klargjort.

#### Høve til å gje administrative avslag og godkjenne mindre endringar i tilskot

Fylkesdirektør for innovasjon og næring har høve til å gje administrative avslag dersom prosjektet ikkje er innanfor gjeldande retningslinjer og prioriterte satsingar.

Etter at tilskot er gitt må tilskotsmottakar søkje fylkeskommunen dersom dei ynskjer å få gjere større endringar i prosjektet. Fylkesdirektør for innovasjon og næring får fullmakt til å vurdere om slike endringar skal godkjennast.

## **3. Finansiering**

#### Maksimal støtte

Maksimal støttedel frå fylkeskommunen er normalt inntil 50 % av totalbudsjettet til prosjektet (eks. mva). I særskilde tilfelle som til dømes forstudiar og forprosjekt kan prosjekt støttast med ein høgare sats. Dette skal grunngjevast særskilt i saksutgreiing.

#### Sats for eige arbeid i prosjekt/krav til oppfølging

Reglar for godkjent timesats for eige arbeid følgjer Innovasjon Norge sine til ein kvar tid

gjeldande reglar. Tal timar skal spesifiserast både i søknad og ved levering av rapport/rekneskap.

Samfinansiering Prosjekt kan normalt ikkje kan få støtte frå fleire finansieringskjelder som fylkeskommunen disponerer, eller har overført til andre.